



## ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

### ՈՐՈՇՈՒՄ

08 ապրիլի 2022 թվականի թիվ 50-Ա

ք. Երևան

#### «ՄՈՒԼՏԻ ՄԵԴԻԱ-ԿԵՆՏՐՈՆ ԹԻՎԻ» ՓԲ ԸՆԿԵՐՈՒԹՅԱՆ ՆԿԱՏԱՍԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովն (այսուհետ՝ Հանձնաժողով) ուսումնասիրելով դիմումի հիման վրա 2022 թվականի մարտի 22-ին հարուցված թիվ 7 վարչական վարույթի նյութերը՝ *պարզեց*.

Հանձնաժողով մուտքագրված «ՄՈՒԼՏԻ ՓԱՐԹՆԵՐ» ՍՊ ընկերության (այսուհետ՝ Ընկերություն) դիմում-գանգատում նշված է տեսալսողական մեդիաձառայություն մատուցող «ՄՈՒԼՏԻ ՄԵԴԻԱ-ԿԵՆՏՐՈՆ ԹԻՎԻ» ՓԲ ընկերության (այսուհետ՝ Հեռարձակող) «Կենտրոն» տեսալսողական ծրագրի կողմից ոչ սեփական տեսալսողական հաղորդումն (Ֆիլմը) առանց դրա հեռարձակման իրավունքը հավաստող փաստաթղթերի հեռարձակելու փաստի վերաբերյալ:

Ըստ Ընկերության՝ Հեռարձակողի կողմից առանց նախապես իրավատիրոջ թույլտվության ձեռքբերման 2022 թվականի մարտի 04-ին ցուցադրվել է «UNDISRUPTED 2» («Неоспоримый» 1x98 ԱՄՆ, 2006թ.) ֆիլմը (հեղինակային իրավունքի օբյեկտ), որի Հայաստանի Հանրապետության տարածքում ցուցադրման բացառիկ իրավունքը պատկանում է Ընկերությանը: Ընկերությունը հայտնել է նաև, որ «TREBLO MEDIA LTD» ընկերության հետ կնքված բացառիկ լիցենզիայի պայմանագրի համաձայն՝ Ընկերությունը կրում է պայմանագրային պարտավորություն իրավատիրոջ հանդեպ՝ իր իրավունքները երրորդ անձանց խախտումներից պաշտպանելու ուղղությամբ:

Դիմումում նշված է նաև, որ Ընկերության և Հեռարձակողի միջև վերոնշյալ ֆիլմի հեռարձակման իրավունքի տրամադրման լիցենզիոն պայմանագիր կնքված չէ, որը թույլ կտար հեռարձակել ֆիլմը Հայաստանի Հանրապետության տարածքում:

Ընկերությունը համադրելով դիմումում նշված փաստերը, Հանձնաժողովին խնդրում է՝ իր կողմից ներկայացված հեղինակային իրավունքի խախտման և իրավական հիմնավորման հիման վրա հարուցել վարչական վարույթ և Հեռարձակողի նկատմամբ կիրառել «Տեսալսողական մեդիայի մասին» օրենքով նախատեսված պատասխանատվության միջոց:

Հանձնաժողովը ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի ա) կետով և հիմք ընդունելով

Ընկերության դիմումը՝ 2022 թվականի մարտի 22-ին Հեռարձակողի նկատմամբ հարուցել է վարչական վարույթ:

Հանձնաժողովը հարուցված վարչական վարույթի մասին 2022 թվականի մարտի 23-ին ծանուցել է Հեռարձակողին և հայտնել, որ այս հարցի վերաբերյալ իրենց պարզաբանումները, բացատրությունները և Ֆիլմի հեռարձակման իրավունքը հավաստող փաստաթղթերը կարող են ներկայացնել Հանձնաժողով:

Վարչական վարույթի շրջանակներում Հեռարձակողը 2022 թվականի մարտի 24-ին Հանձնաժողով հասցեագրած իր պարզաբանման մեջ նշել է հետևյալը.

*«Հեղինակային իրավունքի և հարակից իրավունքների մասին» ՀՀ օրենքի հեղինակային պայմանագիրը կարգավորում է հեղինակի կամ հեղինակային իրավունքի այլ իրավատիրոջ ու օգտագործելի փոխհարաբերությունները և կողմերի համար իրավաբանական երաշխիք է: Նույն օրենքի 27-րդ հոդվածի համաձայն՝ Գույքային իրավունքների փոխանցումը և ստեղծագործությունն օգտագործելու համար թույլտվությունը ձևակերպում են հեղինակային (բացառիկ կամ ոչ բացառիկ) պայմանագրով: Ոչ բացառիկ պայմանագիրը պահպանելով ստեղծագործությունն օգտագործելու և այլ անձնաց թույլատրելու բացառիկ իրավունքների իրավատիրոջ իրավունքը, թույլատրում է օգտագործողին ստեղծագործությունն օգտագործել միայն պայմանագրով հաստատված սահմաններում: Համաձայն վկայակոչված նորմի 2021 թվականի դեկտեմբերի 30-ին «Բեսթ Մեդիա» ՄՊ ընկերության հետ կնքվել է ոչ բացառիկ իրավունքով պայմանագիր (թիվ 01/22): Նշված պայմանագրի դրույթներին համապատասխան ձեռք են բերել, ինչպես ծանուցման մեջ նշված ֆիլմը, այնպես էլ այլ ֆիլմեր, գեղարվեստական սերիալներ:*

Հեռարձակողը իր պարզաբանմանը կից ներկայացրել է նաև վերը նշված պայմանագրի և պայմանագրի թիվ 1 Հավելվածի պատճենները:

***Հանձնաժողովի հիմնավորումները (պատճառաբանությունը) և եզրահանգումը.***

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

«Տեսալսողական մեդիայի մասին» օրենքի (այսուհետ՝ Օրենք) 2-րդ հոդվածի 1-ին մասը սահմանում է.

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, Օրենքը, «Զանգվածային լրատվության մասին», «Էլեկտրոնային հաղորդակցության մասին», «Հեղինակային իրավունքի և հարակից իրավունքների մասին», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգիրքը, կարգավորող պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը»:

Օրենքի 10-րդ հոդվածի 3-րդ մասի համաձայն՝ ոչ սեփական տեսալսողական հաղորդումները կարող են հեռարձակվել միայն դրանց հեռարձակման իրավունքը հավաստող փաստաթղթերի առկայության դեպքում:

«Հեղինակային իրավունքի և հարակից իրավունքների մասին» օրենքի 65-րդ հոդվածի 1-ին մասի համաձայն՝ սույն օրենքով պահպանվող ստեղծագործության կամ դրա էական մասի կամ հարակից իրավունքների օբյեկտի ցանկացած օգտագործում

անօրինական է, եթե նախապես, մինչև նման օգտագործումը ձեռք չի բերվել հեղինակային իրավունքի կամ հարակից իրավունքների իրավաստիրոջ թույլտվությունը:

Ստեղծագործության էական մաս է համարվում ստեղծագործության որևէ մասը, որը տվյալ ստեղծագործությանը ծանոթ ցանկացած անձ ինքնուրույն կարող է նույնականացնել որպես այդ ստեղծագործության մաս:

Հանձնաժողովի կողմից ուսումնասիրվել է վարչական վարույթի մասնակիցների կողմից ներկայացրած փաստերը, որոնք համադրվել են Ընկերության կողմից Հանձնաժողով ներկայացված ապացույցների հետ, որի արդյունքում հայտնի է դարձել, որ Հեռարձակողը ոչ սեփական տեսալսողական հաղորդումը՝ Ֆիլմը հեռարձակել է դրա հեռարձակման իրավունքը հավաստող փաստաթղթերի առկայությամբ:

Այսպիսով, հաշվի առնելով այն փաստը, որ Հեռարձակողի կողմից ոչ սեփական տեսալսողական հաղորդումը՝ Ֆիլմը հեռարձակվել է դրա հեռարձակման իրավունքը հավաստող փաստաթղթերի առկայությամբ, ուստի վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով Հեռարձակողի նկատմամբ հարուցված թիվ 7 վարչական վարույթը ենթակա է կարճման:

Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

1) վարչական իրավախախտման դեպքի կամ կազմի բացակայությունը:

Վարչական իրավախախտումների վերաբերյալ ՀՀ օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

2) գործի վարույթը կարճելու մասին:

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և հիմք ընդունելով «Տեսալսողական մեդիայի մասին» օրենքի 10-րդ հոդվածի 3-րդ մասի, «Հեղինակային իրավունքի և հարակից իրավունքների մասին» օրենքի 65-րդ հոդվածի 1-ին մասի, Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները՝ Հեռուստատեսության և ռադիոյի հանձնաժողովը **որոշեց**.

1. Կարճել «ՄՈՒԼՏԻ ՄԵԴԻԱ-ԿԵՆՏՐՈՆ ԹԻՎԻ» ՓԲ ընկերության նկատմամբ հարուցված թիվ 7 վարչական վարույթը:

2. Սույն որոշումն ուժի մեջ է մտնում այն վարչական վարույթի մասնակիցներին պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՑԻ  
ՀԱՆՁՆԱԺՈՂՈՎԻ ՆԱԽԱԳԱՀ**

**Տ. ՀԱԿՈԲՅԱՆ**

08 ապրիլի 2022թ.  
ք. Երևան